



增城縣志卷之八

祠祭

祭之爲言際也所以使人神相際也而尚書大傳曰祭之言察也察者至也言人事至於神也則今之奉牲執鬯以從事固將聚一邑之心而薦之可不敬與祠者祭名漢高過魯以太牢祠孔子是也自齊人爲石慶立祠謂之石相祠於是尸祝者紛紛矣今其鄉之先正與邑之先大夫類皆功德顯著宜食其報其祠之在官者志之以徵國故焉其

祠之在民者志之以驗民心焉自此以外搏土刻木丹碧相望蓋始於燕齊迂怪之說迨浮屠老子之學盛而其類益繁然由來已久不能廢也易曰用史巫紛若吉叅同契曰絜土立壇宇朝夕敬祭祀鬼物見形象夢寐感慨之

秩祀

文廟

歲用春秋仲月之上丁釋奠本縣掌印官行禮教官分獻十二哲屬員分獻兩廡康熙四十九年後武官

一體入廟行禮前期齋戒先一日省牲滌噐其陳設禮儀樂章樂舞皆如制

崇聖祠

將祭文廟則先致祭於崇聖祠本縣掌印官行禮儀同文廟

名宦祠

春秋二丁釋奠後即祀名宦本縣掌印官行禮儀同兩廡

鄉賢祠

春秋二丁釋奠後祀名宦畢即祀鄉賢本縣掌印官行禮儀同名宦

忠義孝弟祠

雍正初建在學宮之左本縣官春秋致祭儀同鄉賢

節孝祠

雍正初建在學宮之西本縣官春秋致祭儀同鄉賢

社稷壇

在城北門外每歲春秋仲月上戊日祭前期齋戒省牲至日本縣掌印官行禮先足壇久廢無址邑人湯

氏以已地輸官建之計壇前儘北凡九丈五尺東西各七丈前有上宿所庫房神厨養牲所水池俱如制今圮

附邑令文章重建三壇記畧增城山川社稷及厲為壇三厲舊無壇山川社稷舊壇亦圮且盡居民牧豎視為荒坵縣令值春祈秋報罔寧於心亟欲新之未果既三載於茲民物安阜迺進父老論之曰三壇俱敝莫可妥神役不可已今材儲食蓄明將事事咸惟命是聽於是詣壇達觀山川地卑而近河少漲則浸於是石基而磚其壇用二萬三千有奇以赤石為蓋用九十八丈工匠用三百六十有奇壇通為門一中為祭臺一為齋房三環臺植松竹果木百本社稷少高水不之及壇悉用磚一萬七千有奇蓋石六十八丈工匠二百七十有奇舊厲卑不可壇培土三尺亦用磚一萬二千有奇蓋石基石皆五十丈工匠三百

二十有奇門臺松竹三壇一也肇於戊戌臘月成於今仲春規制一新祀事孔嚴矣乃復進父老祝之日惟爾有神尚相吾民陰陽風雨以時適均菑疫弗作禾麥滿畝厲不為屯惟爾有衆受神之祉勤儉孝友睦親和里以公滅私今日是始永奠乃止祝既父老率衆謝曰君侯願欲我民者篤矣遠矣今日豈其然乎夫營繕之役勞費財力得已弗為也是舉也豈得已哉欲相體保終俾勿壞足已惟時襄力則有丞劉永簿馬林督役則有典史黃珍終始典厥事記厥成則縣令文章也

風雲雷雨山川城隍壇

城南門外每歲春秋仲月上戊日祭本縣掌印官行

禮

先農祠

在相江舖風雲雷雨壇之後雍正間建祠三間中供先農神位列祭器農具於兩旁外築圍墻墻外蓋公所三間離祠前三丈築一壇橫縱各二丈四面皆有堦級壇之前用土填平長三丈仲春亥日壇長張青布大帳列祭品如文廟黎明本縣掌印官率屬官詣祠奉神安位於壇上朝服主祭立壇上陪祭立壇下行三獻禮祭畢送位入祠乃耕藉

武廟

相江舖風雲雷雨壇之前舊有關帝古廟雍正五年

列入祀典每年五月十三日致祭又每年春秋仲月上丁之次日致祭行三獻禮後殿安奉光昭公裕昌公成忠公神位如崇聖祠之制凡祭關帝於正殿必先奉三公位致祭其儀略同惟正殿則特用太牢乾隆十二年重修教諭梁鳳來有碑

城隍廟

城隍之神與風雲雷雨山川神同壇於春秋上戊日致祭廟中不復專祭惟守土官到任先期齋宿誓於神朔望行香遇水旱赴廟祈禱祭厲則奉神位於厲

壇正中以主之廟在南門內稍西即菊坡書院故址先是有司遷於縣治左天妃廟廢址淺陋不稱嘉靖十四年知縣孫雲相舊宇而遷復焉給長慶寺田一項

按記嘉靖乙未當為十四年舊志作十年誤附知縣孫雲重復城隍廟記畧嘉靖乙未冬余自夜即蒙恩量移增城既至齋宿邑城隍廟祭告而後即事廟故為天妃祠毀以宅神偏置縣東南一隅湫隘傾圯神罔安靈顧瞻蹶躅進僚友問曰茲何苟簡至此僉曰邑南隅故有廟在昔遷神於斯將事改作而卒不潰於成迄今凡十年茲因其舊而新之固增民之願也越日往觀之則榛蕪翳目棟宇撓敗然可雍而葺也亟命鄉耆經營之告於神而遷焉遂新作廟門三楹儀門三楹門左右厦二楹中作甬路路之中

傲戒石亭作亭刻石其文曰繫善與惡神佑以誅威靈有赫人心安歎前後堂寢六楹悉仍舊加新儀章軌物具備堂左右作厦二楹召守廟道士居之且令度徒以嗣給舊毀長慶寺田一頃為歲時香燈脩廟之須是役也經始於冬十一月至日竣功於春正月既望計費若干兩閱月而舉之民不知財所由出與力所由勞蓋邑賢士大夫相成之功居多也自今厥後吾民瞻仰之下赫赫洋洋頓革反道敗德之心而默啟遷善徙義之念則是役不為無助於我之政而神亦不可謂無功於吾民矣

嘉靖四十五年知縣王師性修之隆慶元年訖工

附邑人黃文典重修城隍廟記畧城隍廟在縣南菊坡之麓地僻而勝嘉靖歲壬午遷於城東廢天妃宮乙未崑山員外郎孫公雲來知茲邑百度聿修以市囂莫可棲神改復舊廟神人以宜閱今歲逃廟頽將不可支晉江王侯師性至鎮靜無擾民咸獲庇始視廟乃曰愛民敬神一也是誠在我乃謀諸僚友各捐

俸金屬邑民之樂助義者共圖之經始於壬寅臘月既望鳩工飭材負者椽者砌者斲者繹如也易土以磚周匝三畝棟樑楣楠厥材孔良廟凡三問間濶丈有四尺崇三仞有奇深倍三焉凡八楹前堂深廣稍次楹數如之由甬道東西為兩廊儀門五間八楹堂西去二十武為齋居左右袤界樹址築垣惟謹既歲而畢改元隆慶四月也

後廟田被萬壽寺僧包佔萬歷四十七年知縣謝士

章追出還廟慶福都新庄田地八十三畝六分四釐八毫歲收租銀三十一兩七錢二分四釐

釐又甘泉白岡村西坦田一段一十六畝三分五釐一毫歲收租銀一十五兩令附城十五

約經理為歲時香燈修葺之需

附邑令陸清源重復廟田記畧城隍廟初未有田嘉靖間前令孫君雲遷復舊廟僉備善謀又召守廟道

士給舊毀長慶寺田百畝為歲時香燈修廟之資甚
盛典也亡何僧之狡者侵佔眾莫為稽萬歷間前令
謝君士章謀及修飾之費邑耆老舉前田對乃力復
之歲戊寅廟戶具呈請碑以志余從治茲土以表暴
厥美為快據其所云茲土肇自嘉靖乙未復於萬歷
已未至天啟辛酉始返業焉踰有年所羨蓄羸餘廟
貌繕治一新過者無不肅然起敬前數年寇盜犯境
捐置兵器鏡藥邑以安堵無恐諸凡歲時祈報靡不
修舉又設為諸生賓興之費咸有定式而察淵沾潤
者不得問也廟田之所關固與學田並重哉爰開其
稅畝若干租入若干
勒于碑左以志不朽

康熙二十五年知縣蔡淑於兩廊添建十二司及上
宿所改正頭門

附邑令蔡淑修廟記畧余奉簡命來牧茲土既受事
月朔望必詣邑城隍廟敬禮焉瞻望棟宇傾圮心急
修飾未遑今歲孟夏偶登鳳凰臺周覽山川相觀風
土菊坡之麓城隍廟枕焉雙塔峙前二峰環後靈區
葱鬱秀氣所鍾顧謂諸父老曰有地如此足以安神
棲捍城郭矣夫何歲述廟頽觀瞻不具草萊不葺若
是也諸父老進曰舊廟遷復于此閱百餘年矣君侯
起而繕之福我元元民之願也余於是捐俸鳩工首
飾堂寢次東西兩廊更正頭門遷進數十武與儀門
相接越數月工竣簷楹柱礎煥然一新爰以經始之
期與告成之旦工費若干材
用若干咸鐫於石垂永久焉

雍正三年知縣周天成復捐俸修葺通廟煥然一新

將坊口洲

即雁塔洲

未經種植荒地二十餘畝令十五約

告承捐木築之種竹以供神祀

丈得折實下地稅四
十畝零隸坊都四畝

末甲城隍
業戶內

附邑令周天成脩廟記畧國家秩祀城隍神以其德
超出於高城深池之表有鑒察司民之職與山川之
布歛雲雨以育萬民者等故同祀於山川壇而復崇
以廟守令至之非淫祀比歲甲辰予切令增城受事
未幾適聞輿論以廟貌弗嚴議將修之予忻然曰實
獲我心也因集紳耆定議捐薄俸以鳩工庀材士民
咸踴躍勸功經始於孟夏之吉越秋仲而觀成焉厥
材既臧厥工既良諸父老請曰君侯修廟之功偉矣
盍記諸子曰治民事神令職也何功之有抑聞民神
之主故王者先成民而後致力於神惟願吾民遵守
教條共敦親遜無遊手無好訟無輕生無以衆暴寡
無以私滅公夫而後神降之福雨暘時若年穀順成
家詩書而戶禮樂予庶可幸告無罪於民以告無罪
於神乎諸父老稽首曰君侯之言深得事神之本矣
敢不勉旃因次
其言以鐫之石

乾隆十六年攝縣陳廷枚復捐俸修葺

附邑令管一清重修城隍廟碑記城隍之祀雜見於
南北史併張說杜牧李陽冰之文而究莫詳其所自
始迨明之興而後秩於祀典與社稷等特是社稷之
制在城之西北隅為兩壇一壝而不屋尊之也事之
以神明之義也城隍之神既附祭於岳瀆諸神之次
矣復令天下郡邑皆立廟何與夫先儒謂有社即不
應復有城隍此其說非也古者年穀順成而八蜡通
於是乎合萬物而索饗之凡坊與水庸以下逮於郵
表畷之屬苟有少利益於民者皆得並列於尸祝之
間以食其涓埃之報况乎王公設險以守其國星錯
綦布以藩衛而保障之耕者得安於其野而懋遷有
無者得安於其市高枕而晏卧無風雨之患其安可
忘夏屋之庇焉增邑故無城緣江而棲者生齒以數
十萬計其幸則晏安無事脫不幸而潢池俶擾有風
鶴之警即東西奔竄無寧宇守土者乃為之築障而
保焉而後相恃以無恐入
國朝以來其士大夫歌詩而習禮彬彬乎有鄒魯之遺
俗其父老子弟亦莫不耕田鑿井以康其身以種其

子孫優游太平不復知有革兵之事又百有餘年於茲矣歲辛未惠陽司馬陳公攝理是邦懼廟貌之弗飭命典史馮天錫率衿者鳩工庀材一撤而新之丹牖甫竣適予來承乏齋宿之夕瞻顧森如因知公敷布之優洵足以資效法其諸傳所謂成民而致力於神者與雖然社稷之祭沿之數千載而鄭玄王肅地示人鬼之說紛紛而未有定若夫城隍之神更不容遷就附會指其人以實之而或者謂冠裳肅穆儼然立於堂皇之上者蓋東林之鉅儒此祝史矯舉之詞前史譏之舊矣余心疑之姑存而不論云

厲壇

在社稷壇北而偏本縣官每年以春清明秋七月望冬十月朔俱日致祭邑鬼之無依者奉城隍神位壇正中主之

六賢祠

祀宋周濂溪李延平羅豫章明陳白沙四先生稱四賢祠後增祀湛甘泉龐弼唐二先生稱六賢祠本縣印官春秋致祭儀同名宦

祠原在羅浮黃龍洞見羅浮志及廣東新語後以路遙多寇順治間署縣馮祖快遷祠於誠求書院生員黃應相捐縣前舖二間歲收租銀玖兩以為月課之需

清獻祠

祀宋南海郡清獻公崔與之本縣印官春秋致祭儀

同鄉賢

附邑人伍閻詩夫何造化妙產此名世賢橫曾幾淵
海直步三山巔道德百世師呼吸雷雨隨出手無全
牛歷歷堪鼎彝孤忠久憂國端揆宜戮力當宁側席
思何為樂家食吁嗟宋陽九奇衰蝕仁厚毒手摧綱
常真魏已制肘賢俊幾登崇葉公能好龍大厦支一
木邊馬鳴西風豈謂憚錯飾泉流自中竭辭疏幾十
年義命真皎潔寒波秋露深霜英動豪吟靈鳳奮萬
仞繒繳嗟何心悠悠四百年白日懸青天晨窓對書
讀清風

猶冷然
邑令王良心詩丞相崇祠望八荒透迤古路樹蒼蒼
苔痕不減豐碑舊亭址猶存御墨芳屢疏丹表扶社
稷百年青史係綱常鳳山俎
豆英靈在冠珮興思歲月長
邑司訓王啟宏詩生平仰止此登臺斜日高岡半草
萊尚有典型風士類敢忘大業自公開千年俎豆留
邊土萬古精英應上台海島澄
清吾故里鄉心端向白雲栽

邑人黃世徵詩宋室樓臺幾劫烟菊坡御墨尚依然
碧梧凋去無鳴鳳綠樹春回有杜鵑七札徵書成往
事千秋經濟至今傳登樓此
日重懷古誰繼風流映後先
邑人呂其瀾詩春風習習鳳山岑丞相祠堂歲月深
七札白麻天子眷一坡黃菊老臣心粵邦文獻推唐
宋相水儀型冠古今瞻拜遺
容倍惆悵肯將高節付清吟
邑令管一清詩荒祠寂寂閉山阿父老相傳是菊坡
三擁節旄勳不泯獨辭台鼎志難磨相江已自流芳
遠宋史何因載筆訛今日春
岡無鳳至數椽風雨暮鴉多
邑人湯億詩祠連芳逕枕崔嵬一木能支大厦頽鳳
羽昔曾為世瑞菊花今欲向誰開西陞保障資長策
東粵文章啟後來讀罷殘碑
深愾慕半江斜照獨登臺

忠孝祠

在南門外祀明忠臣叅議王綱孝子王彥達本縣印
官春秋致祭儀同名宦

附陸鏊重修忠孝祀錄序畧人生大節曰忠曰孝自
王遵及馭趙苞乘陴忠孝不相為用世遂難之乃若
父死忠子死孝則晉卞壺父子其人焉孤貞義激良
由天地網緼詎謂一腔熱血已也皇明混一海內潮
民罔受戎索時性常王公有文武材劉文成引薦於
朝使叅議嶺東督兵餉年已七十矣毅然携幼子漁
隱公以行單舸往諭民乃解散歸至增城遇海寇曹
真欲得公為帥公諭以禍福旋厲聲叱罵遂罹害漁
隱甫十六從旁請死賊謂殺孝子不祥縱之使裹屍
歸葬臺使者上其事賜立廟死所錄用其子而漁隱
則躬耕奉母以終今忠孝祠蓋祀公父子云後公六
世孫陽明先生總督兩粵暨今大司馬大中丞十世
孫峩雲公復為是官先後葺宮墻光俎豆豈天有私
意於公哉抑公父子忠孝有以貽之也且性常奉母

避兵五洩山遇道士勸之出遊可免禍公以母在不
許夫惟有性常之不遺生母斯有漁隱之不背死父
况天下殘忍莫如盜寇乃能縱漁隱不殺使昌厥嗣
故五六傳而海日陽明九十傳而越來峩雲兩父子
繼作文武兼資科第鵲起夫惟漁隱之不死於孝子
斯有海日陽明越來峩雲之得世為名臣然則性常
孰非孝子漁隱孰非忠臣乎性常忠武昭著功在潮
陽所缺陷者死於盜賊而陽明先生及峩雲公殲渠
帥定武功又在惠潮諸郡間若報九世之讐者然遂
得駿奔忠孝祠若詩若文且盈籤帙愚謂性常漁隱
不減汴壺眡陽明峩雲二公賢于卞彬遠矣
邑學博梁鳳來重修忠孝祠記忠孝人心也而人心
之感奮恒觸於有象故廟之設迹象事耳而興廢係
乎人心非細故也夫以叅藩王公之祠祀於增江游
也始於明初邑侯朱君而顯令問大禋祀則其六世
裔孫陽明先生焉斯亦天有顯道昌厥後以發幽光
而人心世教所藉以扶持不墜者越今三百餘年矣

里談巷誦猶相與感慕不衰予以乙丑夏司諭是邦
凡往哲先賢有關風化者悉往謁之顧瞻遺像依然
而椽崩垣塌有風雨飄零之患愴懷徒切營繕維艱
顧七年八易其令雖賢宰亦未暇及無已庚午秋集
諸生謀所以修之捐各祠胙銀之羨者以資工料時
有黎子雄傑張子人傑林子琮毅然起任其事擴乃
頭門比肩于武廟其中一木一瓦悉構而新之行道
莫不稱快夫江潞公維舟地因地建祠而新之不忘
初也嗚呼却賊而捐頂踵父以忠報國裹骸而歸邱
首子以孝報親今尚有存焉者乎吾知過墟而哀入
廟而敬不特忠孝之在一家者彌永而彌耀而忠孝
之在人心者亦將愈久而愈奮也廟既成予入謁喜
而記

附六世孫王守仁謁祠詩海上孤忠歲月深舊壘荒
落杳難尋風聲再樹逢賢令廟貌重新見古心香火
千年傷旅寄烝嘗兩地隔商參隣
嗣父老皆仁厚從此層城是故林

九世孫王業浩謁祠詩增江崇祀主恩深忠孝根源
尚可尋仗鉞百蠻彰舊德驅車五嶺獨盟心重祈廟
貌新輪奐莫嘆烝嘗隔鼎參四壁
更饒珠玉燦譜將絃管舞桑林
邑人盧應徵詩祠前一帶抱江深翠栢重簷直半尋
萬古未應銷碧血千秋猶自想丹心傳家豈讓忠臣
卜事志何殊孝子參知是精
靈留粵嶠疊教繩武到芳林

邑人黎粵俊詩巨節今彌顯孤忠久益光昔年藏霧
豹此日仰星鳳五洩曾聞筮三徵始促裝薦函原大
老特簡自高皇趙島蜃為氣韓溪鱈更將欲憑行省
畧因遣尚書郎携子躬单舸之官錦一囊炎峰消瘴
癘潮海淨烟霜轉旆增江潞羅舟海寇狂但能持闕
虎未卽殪妖狼血遂銷為碧天誰問彼蒼氣凌文相
凜兒迥下家行罵賊寧甘死哀親孰反喪抱屍終裹
華昇襯遂還鄉涕泗長辭辟耕耘竟守疆芳踪留相
水遺像肅宮墻椒實宜蕃衍蓀枝盡發揚雲初開麗
溱文武裕青箱帝錫山河重人咸孔孟方征蠻勞斧

城隍廟
三
鉞謁祖奉圭璋拭淚空盈把題詩識不忘故林貽父
老下里効簞漿况復中丞節重來百粵棠星辰高北
極雨露遍南荒屢餽碑前碣堪誇笏滿床新祠饒水
木舊史播琳瑯伏臘村翁走春秋國典彰松楸餘俎
豆忠孝在烝嘗景仰興頑懦瞻依
想鍊剛精靈真可遡白馬恍洋洋

義士祠

在沙貝村祀義士湛懷德有司春秋致祭

土地祠

在縣儀門內左西向每朔望謁城隍廟畢歸謁焉

舊祠

遺愛祠

在北門城外西向今圯祀明副使王大用春秋致祭

附邑令游應龍重建藥谷王公祠碑記畧先生閩莆
陽人官至少司寇當正德末粵山海盜起焚剝無寧
日而增城尤甚公時備兵嶺南提所部臨駐不旬月
遂倅斬其渠帥而撫定其協從數十年積寇以平民
用更生公去思慕若父母然釀金建祠於城南祀之
後圯民復建於城北歲久又圯故老過者歛吁涕洟
萬歷辛巳予奉檄治增按圖志索之荒莽中碑石兀
然徘徊太息而故址溷於民居過者莫知所瞻仰懼
非所以彰顯功德於是捐俸移建於北郭周道旁輦
廢碑樹之新祠又馳書公會孫家相氏請公像圖之
創田八十六畝有奇以供春秋俎豆父老子弟瞻拜
祠下莫不鼓舞舞權呼至有感而發涕者吁是可觀人
心已夫功德之及民者淺或驩娛一時久而磨滅惟
其深入於民心者膠結不解則雖累廢累舉而民亦
愈感愈奮公之祠兩圯矣增遺民更思慕不忘則其
功德之在人心者可觀矣公功著於雲中漁陽上谷

韶潮諸處載在國家掌故即微增之祀且爭日月之光矧俎豆於茲世世乎且公官司寇尊顯矣歸無一晦之塵家相氏今尚僦屋以居而祠反在在有焉嗟乎益足以見公之賢於人矣是為記

邑人盧綸祠碑畧禮曰聖人之制祭祀也有功德於民則祀之夫所謂功者匪必克靖大憝開拓疆宇之云凡所以禦災靖寇安戢人民者皆功也所謂德者匪必教化敷洽鳥獸孚若之云凡所以撫綏困厄孚格人心者皆德也惟功德有大小則祀報有重輕然祀報於一國天下者典制出於朝廷其祀報於一邑者則由夫人之感悅敬慕而不能已也增為廣左輔邑古稱善治正德末山賊黃雪梅寇良田水賊黎世恩寇茶滢聲勢犄角焚剽無寧日兵將束手莫敢誰何朱侯文簡憂之聞於兵備憲副王公遂按部事然猶以赤子無知不忍即加戮招諭再四不從公乃取道分兵右剪左屠出奇立幢卒致二酋于麾下諸黨逋匿者悉蒐誅之都邑晏然公去民慕之相與醵金市村卜祠於城南肖像而事焉亡何祠改社學民不

能奪復建於城北前抱平地後枕秀嶺門堂有次左右有翼而深邃整潔則視前益加焉既成眾詣余請建碑竊惟公之憲廣也平三水定恩平靖新寧招徠樂昌事功不可縷數惟茲一舉法令嚴明故師過而人不犯處置停妥故事集而民不勞收功神速故用省而財不費蒐拾窩慝故巢除而賊無噍類可謂有功德於吾邑者宜人心之感激仰慕而不容已也夫祠寢於南復建於北非深得乎民心疇能祀報若是之懇耶是可嘉也

綿竹令古公祠

在雅瑤村其村人吳廷講市地得古公宅址因建祠焉

石公廟

祀石文光人思其保障功德立廟祀於廻龍關西向
僉憲張公祠

在縣治左街元至正間叅尉鄧英甫剝害縣民僉憲
張光道按縣繫其瓜牙處死民賴以安因立祠以報
之今雖久廢民猶傳誦不衰

尚書張公祠

祀明吏部尚書張度度故宅在城南夏街里人黃夢
說爲立祠祀之

按邑人黎許
有記今不錄

白沙祠

在鳳凰山西麓尚書湛若水建以祀先賢陳獻章今
圯

贊令張王沈三公祠

祀邑令張孔修王良心沈澄春秋通邑紳士致祭又

加沈公六月十四日誕期一祭祠在文昌宮左

附胡廷蘭鼎建賢侯王存吾公祠碑畧詩卷阿之雅
曰鳳凰于飛翾翾其羽亦附于天藹藹王多吉人惟
天子命媚于庶人夫媚之言愛耳吉人奉天子命以
爲政於天下法至備也而惟槩以媚庶人之一辭何
哉傳曰大君以父母天下爲王道又曰民吾同胞夫
父母至愛同胞至親緣至愛以行乎至親是故議道

置法任人凡以行吾愛也惟吉人之事君循法為理以子視其民大君之愛日下而不隔是造其愛者大君而致其愛者吉人也故吉人在位而民悅遷去而民思思不能忘乃圖寄其思於有永而祠像之事興焉其誰能已之抑孰能強之邑大夫存吾王公今之大雅吉人也天稟慈良外若凜然義形於色中則盎然仁不忍人故政戒張急而理效烹鮮五年之間凡奉職循理以致其愛者孰非久大之猷可以繫斯民深長之思者哉增俗故近厚其民懷德而好誼其君子秉道而樂善昔之令增者苟有愛於其民並舉而薦馨上官若猶未也亦往往載在口碑不絕乃今王大夫之愛視諸前令誠未知孰賢然所樹立皆可久之規可大之德故人心翕然胥圖專祠以奉之於是先是多山建鴈塔以益地靈塔陰儘北為臺距臺間有平址焉王大夫亟欲為講堂以明正學未經始而被召以入衆乃即平址為之祠屬余為記余鄙不能遠引乃引卷阿之雅推本王大夫之愛亦猶吉人惟

崇德祠

所命以愛夫成周之民而大夫之入又庶幾召公之對揚於馮翼孝德間也豸山之勝雖未可以槩卷阿之隆而祠塔並峙永作地靈太和元氣之在成周者其永永無斁矣乎

祀鄉賢胡庭蘭春秋通邑紳衿致祭在文昌宮右附邑令游應龍崇德祠記畧去邑城三里而近有豸嶺焉青鳥氏謂是宜塔收顯氣增人文世世利也時相江先生致政家居捐金倡建易五寒暑而鴈塔成增士人德之值先生以病終因請祠先生於鴈塔之陽應龍為紀諸石曰嗟嗟祠者所以祀功德也載在令甲若先生者豐功茂德寧以一塔見乎先生嘗督吾閩學矣布功令追古道士烝烝然嚮風行部至莆島寇適薄城先生輟試登陴授方畧寇尋遁去已而薄會城先生分守東門民纍纍逃至城下門者難之先生憤曰何忍魚肉吾民也令開門內之所活者計

三萬戶又策擒謀者二人手刃之寇遂遠遁會城以
 全先生之伐居多亡何滇寇起獫狁甚將吏莫敢誰何
 當宁才先生轉先生備兵南中禽混天王諸鉅寇不
 遺一鏃南中平而先生解組還矣明農餘暇即講業
 以淑後俊凡為一方人文計至詳也夫士居恒抵掌
 孰不欲效尺寸以自表見哉顧其才難耳惟先生言
 文則式多士言武則讐諸奸出則犖犖處則卓卓斯
 天授一代偉人也豈惟增哉故在閩有碑在滇有祠
 而身嶺之祠誰曰不宜夫先生懿歟非一丹淵之珠
 鄧林之木採者詎能盡之至譚心性之學合王湛二
 氏而咏之曰致與認不分知與理一貫斯則立功立
 德所由來乎穆子所謂三不朽先生庶幾兼之矣

報德祠

祀名宦徐震游應龍林繼衡鄉紳盧應科湯价周校
 春秋與崇德祠一體致祭祠在南山翔鳳觀今圯

賢令鄒公祠

公諱元忠江西新建人祠在鳳池書院大堂之左春

秋紳士致祭

附番禺郭棐祠碑畧邑令鄒公六年于增一朝延津
 之命下終辭不就士大夫耆老空城而送挽舟前後
 于扶胥木灣之涯竟數百里不忍別余時出餞寓目
 深嘆古道之在人心也明年人各尸祝相率徵文于
 余余惟公以癸巳蒞增首嚴保甲問民疾苦單車周
 歷四境去城東四十里而南築陂不煩公帑不困民
 財而澤國獲免於魚鱉丙申粵東饑而增為甚公戚
 之始發贖緩不足繼發預備不足奔走里社人恤人
 賑又收最貧者粥之飯之起死人而肉白骨為粵中
 荒政第一明年稍稔勸各出穀輸社倉民樂為勸積
 穀三千石有奇政暇集諸生明昭心性顧邑學宮湫
 隘章縫廣業無所公曰有司之責也得學左空間官

地館舍之躬自勞民不以勞躬自費民不以費以故
人心競奮各出其貲以佐之先是城南近海地一逢
久雨竈且生蛙鄉民呈請疏通不果公屬政成當即
疏通創為馬步以徐夙患便通濟此又王政之大者
也其他媿政備載口碑不具述述其槩以續粵大記
所未及詳而又見人心之秉彜有真好也公之業在
甘棠之三章又當事欲強留公而終不就也則於白
駒有遐想矣公別號南州新建人夙以理學名家云

賢令陸公祠

公諱世科浙江鄞縣人祀名宦祠在東門河步津亭
之左誕期尸祝

賢令謝公祠

公諱士章江西寧都人祀名宦祠在講院誕期尸祝

附邑人曾受益祠碑畧石渠謝公五載治增而增治
增人思之祠而報焉屬予文以志不朽夫權制之在
上思操之在下以在下自操之思繫之既去之上是
必有已之不能已者則吾猶及記公之於增矣公甫
下車革耗羨簡訟獄禁百姓輕生申請部使免贖錢
之久逋者已又罷捕盜什長與民休息里市惡少第
籍記名狀以觀所發無所發不發也然謀畧人所莫
測擒名盜逃大澤者二人捕斬嘯聚二十餘人恩威
濟於鄉境諸豪猾吏捧按牘莫敢仰視丞簿尉受事
者莫不弭息無敢顛越群小益用凜凜矣學宮圯壞
四十餘年不為有司所急公一旦鼎建之椽桷悉上
材巍然煥然也既而捐俸置田五十餘畝一為會課
費諸生受其利一為社會公燕費鄉紳受其利又建
仙姑廟查復城隍廟田神明受其利慨倉塲之類毀
拮据綢繆而儲積受其利邇年以來刑措不用惟蕩
以春風飲以甘露遊以騶虞鳴以鸞鳳民熙熙如在
化國也公之言曰吾官發軔於斯兒女生長於斯增
吾桑梓也又曰吾日去日遠日遠日思公之難去百

姓如此而百姓之去公也如之何勿思乎不能已於懷亦復誰能已於祠者龜峯之陽鳳臺之陰是構是楹是堂是室悠然有山高水長之風焉菊坡比其南甘泉鄰其西與茲祠若鼎立而為三也吾知異時無綠苔春雨之恨矣

賢令錢公祠

公諱忠愛浙江會稽人祠在相江舖今圯

賢令陳公祠

公諱世鳳四川忠州人祠在南門外今圯

附邑人吳綱祠碑畧增邑舊稱易治邇者風靡習偷法疏而弛致複嶺叢箐為赤白丸藪邑之元氣索然自陳侯蒞增乃出阨危而登衽席政通人和百廢具舉增人翕然歸心三年於茲矣朝廷嘉厥績擢牧和

州舉邑瞻戀泣別悲思不已乃即侯所練兵處祠而祝之勒石以垂不朽庶幾慰所思焉侯諱世鳳號楚章四川忠州人由鄉進士令長沙大有賢聲以直忤左遷補增城南入境時黠寇負隅剿撫迄無成算邑人望侯安靖如農夫之望歲焉侯慨然謂治外者先治內治遠者先自近左右却立案側屏息階下鮮有抱不急之牘溷侯押署者訟牒不遣悍隸惟屬里長刻日追呼聽其束身自詣即止徵比錢糧摘欠以次能如期如額即止士大夫往來獻酬不令喜不令怒即止文學孝秀程其文藝高下使虛往實歸即止其

他丞尉而下肅括惟謹無敢輕用非刑者無敢輕繫囹圄者無敢輕出白票市物及勾攝人者而上下晏如矣上官以峻傲下侯弗怖顯要以甘言嘗侯弗受操真實心行真實事一時號稱治平黠寇凜神君不敢如往時闢入內地矣先是渠魁廖九寰等陰遣惡少託迹公門以為耳目侯廉得三人置於法自是偵謀不通乃設奇出計不煩一矢而悉殲之奪還被擄男婦百餘入邑老稚相慶更生今增之元氣皆侯之

祠祭 舊祠

休養生息也故始歌來暮者去且涕泣思慕之此其
心炳炳乎流金刻石而碑之所由以立也今四方多
事使繼志者咸若人焉聞風者思興起焉將使天下
皆出阡危而登衽席矣豈徒舒邑人無窮之思抑亦
聖朝所深賴也
因書之以為記

賢令陸公祠

公諱清源字嗣白浙江平湖人祠在鳳凰書院內

賢令林公祠

公諱明興原名明順字孝臣閩之澄海人祠有二一

在西庵內一在南門直街東向今城守改為館舍

附南海梁士濟祠碑畧為治者才也馭才者德也不
之德務而為才是騁則民未必思於既去之後思於

既去之後者必其德足以馭才而有誠焉以相聯結
者也增自盜賊竊發蹙蹙靡騁林使君始至謂回天
必自人寧遠必自邇乃約束宿胥健卒維謹遇紳縫
以禮私謁莫能干且察弊如觀火兩造之詞不宿糧
輒厭服去免里役之陋規貸罷民之金矢正供不求
奇羨歲稔不吝賑蠲時固已隱若長城矣值妖氛逼
邑登陴固守賊望風遁去遂率勁旅搗巢穴奪還被
擄子女二百五十餘人及賊肆劫逕口使君復擐甲
率所帥追逐所率不受成算軍潰賊遂擁使君去日
羅拜之使君諭以禍福知不可屈乃奉歸邑焉其至
誠動物有如此使君筮仕翁源以才望量移於增試
觀諸媿政豈徒才者能之蓋有德以運量於其間也
使君性澹而容端學深而行茂逕口之役嘗若有神
呵護之此非其誠所致哉若德不克則誠不結誠不
結則不足以及人况神明乎聞使君未釋褐時正誼
明道一事不苟動以古人自期故出宰花封即展宰
天下之手故增人於寇盜荒殘之際不致顛沛流離
使君於增真可謂父母斯民者矣使君既以績最徵

入臺中增人士不忘厥德爲立尸祝之祠嗣值使君
典試西粵道經增江增人再見如見慈母比別去群
請余捉筆
記之石

大中丞王公祠

公諱來任字弘宇號毅庵遼東人康熙四年巡撫廣
東懲貪除蠹安集流民禁革六大害曰夫役曰民船
曰私抽曰採買曰誣盜曰擅殺劾知縣徐鳳來貪酷
無度城鄉逃亡過半提問置於法增民始獲更生未
幾以京察自陳罷免士民詣闕保留方抵京而病卒
遂爲位朝夕奠哭聲震野因奉主於魁樓前祀之未

有專祠及祠產尚有望於後起者

今附城慶隆相江韓塘龜峯高桂賢儒會仙槎岡高
原儒林新橋東雷接龍岳嶺十四約復捐銀與會仙
觀覺宗以值理城隍神祀之約歲
收息壹兩貳錢爲春秋辦祭用

邑令游應龍祠

在城南門直街東向後爲城守改造館舍

按萬歷壬辰志稱其清丈乖方
民多怨之此祠也胡爲乎來哉

神宇

文昌宮

一在會仙觀一在鴈塔前賓興士必至鴈塔祀之而

後行左為名宦張孔修王良心祠右為鄉賢胡相江

祠有田土名鷄啼涌等壹頃三十
二畝泥紫園三十六畝收其租祀神餘留

為通學賓興之用明季祠圯田為守僧所匿康熙八

年生員湯時聘等控理祠未興復祀神無所康熙四

十七年生員王起曜等復控知縣沈澄乃退出田園

如數眾復捐貲建祠於故址後沈侯復捐俸移建三

祠於山麓以鎮水口人文蔚興因祀沈侯於張王祠

內田畝勒石豎於縣署儀門左

真武廟

在會仙觀右

水僊廟

在會仙觀右

天后廟

附城有三一在東門外津亭右一在南門外橋左一

在相江舖關帝廟右

東嶽廟

在北門外

洪聖廟

在一雷鋪廟上有觀音巖巖右有亭可以登眺

江東廟

在儒林鋪大街

龍母廟

在豸嶺下臨江今爲豸山汛

馬王廟

在南門內大街之東

華光廟

在洪聖廟左入右有文昌閣

靈山廟

在新街塘方壺洲黎榮祖創今廢

真君廟

在合蘭下都石灘村提學魏校毀爲社學今復建於

社學右

集福堂

在金牛都宋咸亨間創元季毀洪武三年重建今廢

三教堂

在縣東水東村今廢有田八畝四分改入忠孝祠爲

祀田

列刹

萬壽寺

在邑治南鳳凰山之東麓東向舊名法空寺宋嘉祐
 間僧鑑圓創為祝釐之所乃改名萬壽寺以後法堂
 奉生佛賓公明洪武十五年設僧會司於此今逢
 聖誕元日長至千秋節及遇祥瑞先期一日本縣印官
 率其屬詣寺習儀畢乃導龍亭至縣堂至日晨興行
 禮寺前為大門樹屏墻以限內外後圮至乾隆十二

年寺僧靈默以所蓄付其徒孫純白惟斯等重修

萬壽寺原額有田九十七畝六分其歸併萬壽寺者
 則下都七仙寺有田二頃一十七畝九分今還義學
 縣西長慶寺有田五頃六十畝七分四釐內除一頃
 還城隍廟尚存田城山四頃六十畝七分四釐龍門
 埔龍門寺有田一頃零三畝七分縣地覺苑寺有田
 二頃九十畝八分縣東報國寺有田二頃八十五畝
 九分以上歸併合本寺田共一十四頃五十六畝六
 分四釐有歸併而田屬民者則招賢寺田六十畝其
 廢寺而入民籍者則金蘭寺有田四頃八十八畝一
 分光明寺有田一十三畝二分真禪寺有田八十七
 畝一分又塘一畝正其歸入雁塔則新興寺有
 田一頃零六畝九分龍山寺有田二十八畝正
 附邑人鄭以信重修萬壽寺記釋氏報恩首重國王
 蓋以普天率土雖乞士之身亦當自盡非過也宜也
 縣治南原有萬壽寺為祝
 聖道場太平日久安於放逸不能茹葷守儉以至僧眾

甚稀莊嚴減色數十年於茲矣寺僧靈默獨以瓶
家風虔於蓄積慨然有志於利人天明色相以富高
厚莫非王土莫非王臣僧其獨賢矣哉有志未逮旋
以示寂眷屬僧舉其遺積呈告當事謀新道場以成
遺志蓋亦善作善成之美舉也爰鳩工庀材無廢不
修煥然接目始於乾隆丁卯年王正告竣於是年之
冬十二月共計費一千二百餘兩其徒孫純白及董
理寺僧等請記於余余曰自蕭梁始為寺而增像代
興推其意不過明一敬而已寺以萬壽名則僧之敬
佛無非所以敬君也今者廷階煥發金碧輝煌遂使
闔邑臣寮躋展敬對揚講讀可謂得釋氏報恩國
王之意矣用以知靈默之意起於節儉而成於報君
良足嘉也嗚呼現成法而示將來使後有作者能體
此意而常轉法輪無忘日新之境庶與此寺永於無
疆也

又附湛會谷詩半夜青蓮映翠微千秋臺畔鳳凰飛
空誇白社風流在翻惜黃金世路非苦海無邊翻貝
葉銀河有路問支磯坐高三
鼓菩提月玉笛風前折竹枝

證果寺

在金牛都縣東北三十里宋皇祐間賓道者削髮於
明山寺化於瑞山石上因徙寺於瑞山之右有田十
餘畝萬壽寺僧一名帶管

附邑人黎粵俊重建修證果寺記嶺以南列剎相望
惟吾增證果寺則賓公之肉身在此焉寺去瑞山坐化
處僅數百武其境變喧而幽其土去穢而淨當增江
上流龍門下滌辟在萬山舟車不轉所以數木支持
陋椽秃宇自賓公開座以來歷宋至成化間始一修
之迄今又二百餘年凡宴坐經行之淨域盡為風雨
漂搖豈佛法弘護之至願乎崇禎乙亥任持僧圓智
施廣長舌告十方得布地金錢三百餘緡於是鳩工

聚財因新革故悉為料量凡壇殿門廡齋房僧舍緩
亟有序經始於丙子告竣於庚辰凡五春秋而荒廡
廢刹遂復改觀雖云重新實難於鼎創
矣僧以眾檀積力不可泯滅請余記之

謝英遇證果寺詩山寺幾經兵火後佛前難成舊時
燈長廊犬吠初來客净室龍隨久住僧旛影捲時雲
氣合曇花現處日初升人言此
地多佳致更上危峯第一層

邑教諭徐應亨賓公法堂詩南海宗乘開六祖說偈
登壇散花雨黃梅衣鉢自西來萬古曹溪流法乳增
城聖者有賓公真指依然六祖風湛月青天故津筏
放牛拾蜩見神通萬回聖僧傳往昔遠塞飛驕忽生

翮公已辭家日侍親親舍隔江猶咫尺塵緣既盡復
西歸瑞山示寂溪頭石南華證果並留軀慧燄雙懸
海上珠洗心拭誦賓佛
偈化身無乃賓頭顱

黎粵俊宿證果寺詩一徑穿林僻池開象外幽僧歸
千嶂月定八九天秋蛙吹疑鸞鳳蓮燈映斗牛醉來
尋瑞石惟
作意中遊

寶蓮菴

在北門外

東臯菴

在東門城外相江之澚

西園菴

在西門城外以文堂之右

附邑人曾受益詩不謂人烟境蓮花湧陸離香風傳
徑竹落景礙修枝酒肆從他市僧茶屢有施回心觀
净理坐久
不知疲

邑人鄭以信詩蠟屐過招提東風滿郭西禽聲春曉
曉草色暮萋迷碧嶂浮雙塔虹橋跨一溪超然禪理
愜何用
覓丹梯

華嚴庵

在石灘村

附邑人曾受益詩華嚴四面絕塵因坐破蒲團一上
人數畝町畦為事業幾村烟火作芳隣盤供苻藻青
蔬肅客對荷裳白髮新聽法不
知天色改僕夫鞅掌速歸輪

棲雲庵

在雲母都白水止

附邑人吳應新記畧縣治西三十里有白水山邑志
所稱八景此為最勝相江胡先生雅欲結庵未果予

館雲母七夕卧遊而心醉之比重九諸子携予登覽
石磔飛泉從天而下散為曲澗澗長菖蒲雖白雲之
安期巖不是過也漱而飲之沍而寒甘而冽若天漿
然與石門泉良有間多酌不嫌貪矣沿澗左折巖巖
陟巘東瞻羅浮南眺巨海收萬頃江山於澗左折巖巖
間且中峯別墅可作屠蘇山半平疇堪供耕鑿丹崖
翠壁磊落散石似人而非者環向於予望而拜之復
揖山靈而謂之曰安得叱石為菴以發山川靈秀乎
歸途吟咏杖履衣裾猶冉冉有雲霞氣居無何有釋
子某願結菴修持遂鳩工庀材結菴於山之陽顏以
棲雲云菴前有石方丈許若平臺坐可十人上有石
刻一絕云行天拈碧溜溜上駕蜃樓玉汞煨金鼎石
流水不流旁書仙偈字半誌於苔蘚不知刻於何年
似非俗筆也一日予携吟屐訪丹止釋子持茗具若
昔之丹止子引盧鴻于天台瀑布雖不設酒予不行
攢眉態低徊留之不能去也予謂釋子曰盍遍遊諸
名山巨川以大法船耶答曰緣母在雖出家而不敢
遠遊予曰子有母奚出家為釋子曰
上否予直

借茲山時陟圮以望親舍耳予嘉其音因援筆記之以告世之出家忘親者

會仙觀

在萬壽寺右即何仙姑故居觀原在縣東流杯池上

以舊有八仙來遊其地得名唐大歷間道士蔡大乙

改創於此明洪武十五年因開設道會司有田一頃

八十二畝零

何仙姑祠

在會仙觀內祠前有井即仙姑化身處

附兩廣總督劉繼文重修何仙姑廟碑記畧仙姑何氏詩咏及井廟具存前翰林典籍孫君蕢記之詳矣

余初慕仙名而未灼知其出處歲己丑春移鎮端州時澳酋嘯聚海上烏合千餘衆一時未集舟師慮懷叵測因籌計問仙而仙姑憑乩至詩曰用兵勇往是良圖懼敵全身豈令謨將相協心同贊事何愁山寇不銷除謂兵貴擇將也時瓊崖叅將儒怯所謂畏敵全身者因以邵都司往代之不兩月間而我師大捷遂草薙禽獮嶺海寧謐悉符仙識云余得仙姑之佑不忘廼旁搜仙跡而得其井廟故址歲久將及湮頽所謂有其存之曷可廢也遂檄縣重修煥然改觀為文祭焉夫仙姑粵人也仙雖屏謝塵囂逍遙蓬閭而其精靈當必有戀戀於其鄉者宜其談兵決策殲數十年之逋寇以永貽桑梓之洪庥禮有功德於民者祀之然則是舉也無非為粵土保安計耳詎曰諛瀆云乎哉

嶺南道李符陽何仙姑神異記畧余昔棲遲林壑一夕夢如携家赴任狀稍憇旅館東房戶半開窺見一女南向立年十七八許鬢髮圓面綠衣紅裳容顏秀異非人間世有也右携一文左侍一童余詢誰何曰

我何仙姑也女吾在黃生童吾在倪小余喜且驚曰然則仙姑適人乎曰然適人亦可仙乎曰然余婦後至一一以告引之拜而恍然覺矣曰異之此何徵也因思仙經有黃婆嬰兒姪女之說曰仙姑命之矣乃結廬義蒼習養生者十餘年萬歷丁亥朝命起余巡閩庚寅改守粵之嶺南度嶺下韶峯巒聳秀風物瀟灑如夢所憇心竊異之偶閱增志所載仙姑踪跡頗悉增令來謁詢仙姑祠宇規制一與夢合噫余夙聞有仙姑壹不知為增人也十餘年前旅館稍憇之兆豈仙姑預知我有今日之遊耶黃女倪童之說豈仙姑默示我以入道之機耶宦遊茲土以姑之靈聊以無罪敢不勇退急流以終仙姑嬰兒姪女之訓茲將度嶺而北不得親拜仙姑之祠乃檄縣治酒漿為禮刻石記之

邑侯謝士章拓建何仙姑祠記畧仙姑祠在會仙觀之左剖觀東壁而軒之深可丈廣尺者六亦陋甚矣祠前可十武存一井為姑遺履處舊以亭翳之井從陰水味雖冽弗醴也謝子來令是邑得暇偶陟姑亭

延里老問姑遺事里老談姑之仙異不過餐雲母一節述姑性之芳潔則真仙乎非傳記所悉也里老因謀改其地而新是圖且議貨隣寺隙地以益姑半畝宮予可其請遂釀貲協力不匝月而結清宇者二一以為姑龕一為里人設俎燎柏之地并撤其陰是井者而檻以石津津一仙瀛雅觀矣落成請予記之余曰予之為邑為士也為民也豈以為是姑也而媚之雖然姑邑人也邑人則吾民也吾民有性靈不蝕芳潔不溜之子若女父母喜且舉以告人矧為民父母者寧不思儀其賢以教國人耶邑先民如菊坡甘泉此誠不蝕性靈之丈夫矣使不祀於社人心弗勵也姑非芳潔則不能仙姑不仙不表其芳潔邑之女盡芳潔如姑即不餐雲母而無不仙矣是不可傳耶是不可祀耶祀姑以勵增女猶祀菊坡甘泉以教增士皆不可廢也則予表姑亦為士

為民意也故不妨新其祠以記之

邑侯陸清原存仙井亭記畧千載而上有仙焉存乎否也吾不得而知之千載而下有烟囪獨存者心之

靈仙之靈也得其解者可
使在曷為存仙感於井也曷
也姑汕跡載志乘余亦
乃緣以使石之夢而詔之使君按行諸部
庫畢返久臺經屬謁仙迹歸而爽於井亭之圯廢三
致意焉爰考其舊誠如夢中所云乃捐貲為倡而督
余總成余受教經營庀材鳩工井之北撤而殿之井
之東拓而方之縱橫廣數武築臺以拱井雕欄以護
臺去井七尺為亭矐以朱碧顏以存仙亭下西向為
門由門入亭循欄繞井以升堂爰造邃室爰瞻遺像
仙欣欣其樂康矣雖然使君之意豈無進焉者乎考
志姑約身柔靜事母純孝及憑乩授算濟師殄寇則
姑之仙固以忠孝存也古之君子訪羽人於丹丘彼
誠欲以自廣耳度世要亦多術茲非更端以示人也
哉使君又語余曰酌泉冷然善夫我兩人之皆以清
錫名也勗哉余再拜謝曰使君得泉而通於教廉仙
之靈乎心之靈也故曰神而明之存乎
其人得傳仙之解可以上下千載矣

增城縣志卷之九

學校

易安

語有之曰剗而舍之朽木不知剗而不舍金石可
虧子帶之流年盛志美遂涉學庭修其典訓循是
而進之則皆聖人之徒也漢自武帝始為博士置

帝時郡國置五經百石卒史

郡國曰學邑仁國曰校置經師

班固東都賦言

無盛心

國宗誕

少遠無不

朱均魯不

幸得姓少追罪責諸生中顧獨無卒業一經

風齊魯者乎雖然古者八歲入小學學六甲五

書計之事十五而後入大學故上老平明坐於

塾庶老坐於左塾所以教之學也里胥平日坐於

右塾鄰長坐於左塾所以教之耕也增之社學義

學書院星布而碁列所在皆是苟父兄之教先而

子弟之率謹當必有卓然而成材者語又有之曰

丹青之染弗渝其素惟白故可以受采尙勗之哉

學宮

儒學在縣署西北二百武相傳其初業士分四齋宋開

禧間併為二嘉定間復分為四一曰博文二曰果行三

曰移忠四曰履信宋季燬於兵

元至元中邑人太社令李肖龍憫學校廢缺乃與其甥

鄭聰老謀刻孔子木主祀於聰老之家

按舊志作天歷二年自天歷二年至至順二年首尾纔三年爾安得五十餘年

至至順二年縣尹左祥始得儒學故址於冲霄門外

志云嶽廟嶺即至重建中為聖前為露臺翼以

兩廡臺南為戟 入南為楹星門 以為明倫堂堂前

為月臺翼以兩齋由東齋折出為進賢門循東廡後

出為儒學門堂後鶴子峰植松數百株蒼蔚若屏障然

松間為亭

揭後斯重建廟
學記見藝文志

至正四年清獻公二世孫教諭崔振宗重修明洪武二

年詔興學校知縣吉禮乃增飾之十四年湛菜賊陷城

學燬

按湛菜賊即蘇友
與東莞志作湛翠

永樂間知縣童有成黎顯相繼修之宣德三年知縣蔣

謙修正統二年僉事彭琉知縣謹詢修

成化二年左叅政張瓚乃建殿堂齋廡新聖賢像設

泮池築橋以跨之

附弋陽黃溥重修廟學記畧我國家自太祖開基之
初即詔天下建學立廟尊用孔子之道以長以教閱
百餘年矣俗化之美賢才之盛遠繼三代而非後世
之所能及也廣之增城廟學在縣治西北隅年遠傾
圯未有能撤而新之者適叅議張公以使事過縣進
謁先師而嗟廟宇之不飾乃毅然計材用營工役撤
朽去腐一新舊觀廟自大成殿暨兩廡悉加繕治
凡祭器神厨及廟中所宜有者無一不具學自明
堂至兩齋則特亦改作而增建庖廩及師生寓室
夫學中所當溝者亦靡不完他如泮池狹隘則覓埴

若干以廣之橋門未立則伐石若干丈以建之闢地
 以為階路築土以繚垣墻歸然煥然儼若魯侯頽宮
 而出色於增江山水之間然是舉也不勞於民不
 於官人但見其成而不知其所以成殆本乎大參公
 為之有其道也既訖工其學之教諭潘楚訓導林旭
 詣予請書其事俾後來知其自焉予忝司憲一方
 固當有言為士君子告况有來請者乎夫帝王學校
 之教壹是皆以明人倫為務何也君臣父子夫婦兄
 弟朋友之倫雖無一人之不有但為氣拘物誘而喪
 焉者眾故天命聖人居君師之位治而教之必羣之
 于庠序聯之於師儒開之以詩書禮樂培之以孝弟
 忠信俾於君臣也知尚其義於父子也知尚其仁於
 夫婦也知尚其禮以至於兄弟也朋友也亦莫不知
 尚其友尚其信而人道立矣人道既立推之修身而
 身修推之齊家而家齊由是達之治國平天下則國
 治而天下亦無不平矣此君子為學之大要也而朝
 廷敷教作人之意與大參公飾學崇教之心又寧不
 以此望於諸士子乎若其辭藝之習記問之功雖修

業問學者有不可廢然要不能無本末輕重之差于
 因推本而記之叅政公名瓚字宗器世家德安之孝
 感與予為同年進士云

嘉靖六年知縣朱道瀾重修於池外為屏墻

附邑令朱道瀾修學記乙酉冬予來宰茲邑三日謁
 文廟畢升明倫堂坐諸生講經書諸生請曰諸士子
 久失教養惟大人之依焉予既不敢拒為之治行考
 業相劇切踰年諸生又請曰今學校弊矣數年科貢
 弗興盍作諸子曰學之作抑人之作也曰有二乎曰
 有詩曰既作泮宮學之作也又曰遐不作人作夫人
 者也曰盍學之作哉明日遂召匠視自殿迄堂降于
 門以及凡舍宇之當易者計若干費總撫姚公寅之
 巡按涂公夢卜督學歐陽公崇道曰可主簿郭澄董
 匠作事既集帥諸生釋菜禮成語之曰茲學作矣
 教之乎曰未也曰殿之制昔隘以褻東西闕各若工
 楹示其強也堂椽柱橈腐基之磚示其立也門卑淺

如弗容易之宏且整示其豁也庭以石示其平也階
 三級或五級六級示其序也門之外曠而弗收環之
 垣百二十餘尋示其歛也泮濶大而肆中之亭示其
 止也棟宇棖題丹雘加焉示其文也諸生知之乎咸
 唯唯如有受退而修焉則視弘以為量視立以為志
 視豁以為識平以視履序以敘倫歛以治心文以華
 行止以歸宿率學而由之無二也其年秋張生文海
 伍生閻湯生价屈生一鰲果以賢薦鄉書育庠之俊
 亦各有成效焉人必曰作學之功也信乎學之作而
 人之作亦係焉矣若吾夫子之道之崇則固亘古今
 窮天地初未嘗一日息也而學之作與否弗預焉雖
 然學以明教也教以由道也道者吾夫子之道是矣
 由吾夫子之道則學
 之作亦或有小補云

十四年知縣孫雲復於墻南正中為坊額曰夫子宫牆

邑人湛若水書之

十七年前令朱道瀾為廣東按察司僉事檄縣益其所
 未備知縣文章乃建啟聖祠東南列號舍二十四間為
 士子肄業之所今廢

附邑人盧綸修學記增隸廣故有學閱歲久遠棟宇
 摧頹儒效濶疎嘉靖乙酉莆陽朱公道瀾由名進士
 來知縣事初至寬徭役祛蠹弊立鄉約敦化善俗尤
 大懼學校之壞而弗振也值歲歉恐妨民未遑事事
 越明年丁亥始鳩工庀材次第修舉豎立文廟葺兩
 廡平階輝侈儀門崇櫺星門煥明倫堂于後闢方池
 於前築臺於中改舊路分為東西繚垣墻六十餘尋
 皆其維新之制然也日有課月有試朔望則升堂講
 論閒暇則問德考業驗其進修警其頑者怠者優其
 賢者能者禮其有德行者有文學者助其貧者力不
 足者又其維新之教然也夫新制所以作學新教所
 以作人二者並行而不悖者也是歲戊子鄉試登科

者凡四人民歌之曰朱公作人效速如神無何被命入補廡職士民送之江滸請曰立遺愛碑於學公口無以爲也有幸余將復來既六載果陞廣臬命憲復行部至邑慨前工未備而舊修者若有殘毀卽檄縣命官繕理遂峻藩墻砌圯塌藻飾牌坊甃甃街池植種松竹自堂徂門皆黝堊丹漆而污墁繪采焉又爲號舍于學宮之左凡二十楹爲戟門二楹爲廨舍者三凡若干楹祭品有設庖廩有備貯藏有所未幾督學吳公鵬臨縣又以其學政申明而修飾之增廣生員濟濟誦誦於是乎才俊充斥輪奐改觀而風聲赫然矣是役也皆出自公帑一無所取于民肇工於戊戌歲八月落成于己亥歲三月諸生復申請之曰立遺愛碑于學公仍曰無以爲也有幸予將復來文侯章乃倡言於象曰興學盛事也重臨異數也不可以不記遂徵言於余嗚呼君子之於天下也事之當然者在已容可能也數之適然者在天不可必也方公之去也士之慕之焉知今之復來乎今之去也士之慕之又焉知後之不復來乎蓋公一念之誠始終不息故其愛願之應若或相之非人之所能爲也詩曰肆成人有德小子有造古之人無斃譽髦斯士公之謂矣書曰念始終典于學請以是爲諸生勗焉

萬歷三年知縣王良心又修自殿堂門廡撤而新之

邑人胡庭蘭修學記見藝文志

至萬歷四十七年歷歲滋久又所在傾塌知縣謝士章始藏聖像易木主卽聖廟故址而重建焉前爲露臺環以石欄堂下爲廣墀東西廡深視廟三之一前爲戟門兩偏間爲庫房名宦鄉祠未建則權祀名宦鄉賢於此又前爲櫺星門廟東北爲啟聖祠今改額崇聖祠

天啟四年知縣錢忠愛乃建魁樓於學之左

魁亭前在鶴子峰左

後移儒學門外至是始建樓

附順德黃儒炳修學記畧增城縣學初得址於兵燹中明興樹教育賢有司奉職嘉靖丁亥邑令朱道瀾重修厥後文章張孔修王良心循良嗣事加意釐序制亦隨時明備歲久土木傾蠹縉紳縫掖咸樂更始萬歷丙辰貴州謝公士章下車寓目悚神率青衿籲當途捐俸釀金鳩工改創巍然煥然革故鼎新公計行府佐蒼梧陳公堯典蒞署建啟聖祠徙邇於廟東會稽錢公忠愛繼宰增圖令終前美測臬卜位莫祀文昌稱文明奇觀展墻表坊次第報竣殫力揚休於枚實之地是役也肇自萬歷己未冬至乙丑凡七載歷三大夫用成嘉績為增江振起士風云

崇禎十一年知縣陸清源乃改明倫堂於廟左後為教

諭衙廟西為訓導衙

按舊志作十年據記經始戊寅當為十一年東莞蕭奕輔記見藝文志

國朝順治十二年屏墻傾圯訓導王德新捐俸修復

康熙二年知縣徐鳳來修學移文廟稍左一丈四尺夫

子宮墻牌坊及屏墻石橋教諭訓導衙皆拆毀

康熙二十七年訓導王啟宏以兩廡先賢木主殘缺失

次捐俸重刻

康熙四十八年知縣沈澄修學宮考正先賢先儒名宦

鄉賢位次拓櫺星門丈許濬泮池跨以石橋橋上為欄
杆於夫子宫牆舊址建照牆一十丈石刻夫子宫牆四
字嵌於其上椽題楹桷煥然一新又建義學凡大堂後
樓書舍若干楹於右以拱衛焉

雍正初知縣邵鳳起周天成奉

旨建忠義孝弟及節孝祠雍正七年前知縣周天成復
署縣事捐俸建聖域賢關兩坊環以疎墻二十三丈東
西立下馬石

雍正八年知縣鹿謙吉以崇聖祠在東北隅湫隘無以
表尊敬謀於闔邑紳士建於正殿之後五間八楹規模
弘敞又建明倫堂於正殿之東儒學門及櫺星門牆一
切新之上建大中丞王公祠復舊渠清佔地

乾隆十五年教諭梁鳳來遷崇聖祠於正殿之東仍以
後殿為明倫堂建大魁樓於學宮東南又建名宦鄉賢
祠於明倫堂左

附邑令張起麟鼎建文閣記余以巳巳冬出宰增邑
增之文廟舊建於城西北隅枕鶴嶺而面鳳岡龜峰
峙其左其形勢可謂盛矣以故磅礴鬱積而為偉人
宋則有崔菊坡明則湛甘泉諸先生彪炳史冊後先
輝映語云地靈則人傑信哉
國朝文教覃浹則亦宜有偉人如崔湛二先生者以上

應旁求俊乂之意乃增邑邇來登賢書者雖不乏人然卓犖奇傑不世出者似不多觀豈風氣之殊歟抑振興之有待也歲在乙丑學博梁君以淹洽鴻儒秉鐸斯土力以振興斯文為已任其所以課士者亦既詳而有法矣又以廟前之西廡舍森立如星羅碁布而東偏缺如爰謀諸紳士創建大魁閣于辰巽之位以應文明環以青雲橋路榛莽荒蔓芟而闢之曠如也而且福神名宦鄉賢諸祠連亘於宮墻之左缺者補之狹者恢之靡不豁達整齊煥然一新自庚午夏至辛未春凡兩越歲而工告成夫以增邑疇昔人物勲猷文章之盛如此梁君作育之殷心力之勤又如此增之人士誠能相與敬學尊師鼓舞不倦而均從事於隨處體認天理之學復深勿忘勿助之功行見人材輩出當必有偉人如菊坡甘泉諸公者接踵而起矣夫然後斯閣之建不虛梁君振興斯文之念以慰余也蒞治茲土亦且拭目以觀文風之盛是為記

今規制畧備其大成殿奉

大成至聖先師孔子及四配十二哲位東廡先賢自遠
 瑗以下先儒自公羊高以下共六十一位西廡先賢自
 林放以下先儒自穀梁赤以下共六十一位崇聖祠奉
 肇聖裕聖詒聖昌聖啟聖凡五位以先賢配凡四位兩
 廡從祀先儒凡五位其附祠於學宮者名宦祠祀元縣
 尹左祥明知縣黎禧朱道瀾文章王良心徐振林繼衡
 陸世科謝士章教諭廖如嵩楊啟新共十一位後增巡
 撫王來任朱弘祚楊宗任總督孔毓珣巡撫楊文乾凡
 五位鄉賢祠祀宋綿竹令古成之南海郡清獻公崔與

之太社令李肖龍明吏部尚書張度饒州府同知吳澹
戶部郎中姚珩延平府同知湯文經四川按察使盧綸
南京兵部尚書謚文簡湛若水建始知縣張潮雲南兵
備僉事胡庭蘭戶部主事潘禹謨漳州府同知盧崇勳
建昌府推官王三奇共十四位外列忠義孝弟節孝等
祠皆如制

按學宮鍾鶴嶺之秀自百花林分枝迤邐經西園菴
後聳起岡巒亥龍結落與龜峰龍脉互相夾從而龜
峰右出鳳臺爲之几案又有浮碇山鷄母谿輔弼左

右且水口鎮以牙嶺南山二峰如日月之合璧建學
嶺麓洵絃誦之勝地也聖廟舊址偏西未接中頂正
脉爲形家所議然猶代產名賢鬱爲粵望迨前明中
葉穿濠西北鑿斷來龍繼又疊建鴈鳳二塔名曰雙
柱插銀河實則陰陽破體頓掩日月之光而增江士
族乃無復曩之科第聯翩矣康熙初知縣徐鳳來遷
廟於左傍一丈四尺坐向失宜仍與中頂不接而牌
坊屏牆之屬一槩拆毀遂致西偏孤露無輔後知縣
沈澄病之然亦未遑改作僅建義學於西以爲拱衛

之勢雍正八年知縣鹿謙吉以堂水西出爲非乃塞其舊竇疏渠使趨城南隅於是元辰直流氣脉益渙洎乎大魁閣之建室塞天門且誤以巳位爲巽位法於坐宮爲破軍尤與師生妨碍議者咸藉藉焉邑孝廉溫君潔素習堪輿家言嘗云轉回地運首宜改建學宮次則前塘出水修復原竇辛位而遷魁閣位於坤作庚甲向使恩星得地庶振起人文之一助計其工料費將不貲謀諸邑紳尙無成議有志者事竟成敢不勉諸

學生

順治四年定直隸各省儒童入學名數增城爲中學取三十名康熙九年定額中學十二名雍正二年奉上諭令督撫會同學臣查明實在人文最盛之州縣題請小學改爲中學中學改爲大學大學照府學額取錄增城向係中學今改爲大學取進十五名遇歲科兩試照額錄取儒童送學肄業現在廩增附生共二百三十八名內廩膳生二十名增廣生二十名候廩候增及附學生無定員每二歲歲貢一名遇

恩典則以正貢作恩貢以次貢作歲貢遇選拔之歲選貢一名又武童遇歲試取進十二名現在武生共九十
八名其他舉報優劣季考月課及一切學規皆遵照會典如制行

禮器

文廟銅祭器

大小香爐七 大花瓶二 大小燭臺二十 大小爵二十有八 登五 有蓋 銅十有二 簠八 有蓋 簋八 有蓋 尊三 有蓋 毛血盤五 盥盤一

共九十九件明知縣鍾綱謝通及本學相繼造迨雍正元年查失登四銅一十二簠八簋七尊二所存一簋亦失蓋

兩廡銅祭器

香爐一十有四 燭臺二十有一 簠十有四 有蓋 簋十有四 有蓋 尊二 有蓋 爵一百有九 毛血盤二 盥盤二

共一百七十八件亦知縣鍾綱等相繼造雍正元年查簠簋毛血盤盥盤全失爵存內缺一足者六

崇聖祠銅祭器

大小香爐六 大花瓶二 大小燭臺一十有六

爵二十 尊一 登七 有蓋 簋七 有蓋 簠七 有蓋

劔一十有一 毛血盤五

共八十二件并名宦鄉賢祠銅爵俱明知縣文章造雍正元年查失登六簋六毛血盤三所存一登亦失蓋

名宦祠銅祭器

爵三

鄉賢祠銅祭器

爵五

各祭器

竹籩二百七十六 木豆二百七十六

明知縣張孔修造崇禎三年教諭徐應亨重造俱無存

新置祭器

磁爵十有六 銅爵十有四 錫劔十有五 錫簋

五十二 錫簋五十二 竹籩二百有十 木豆二

百有十 銅酒尊三 銅龍勺一 繡龍幕一 獻

帛盤二十四 祝文牌二 俎盤連桌一

以上乾隆元年置

樂器

鼉鼓一 應鼓一 搏拊二 編鐘十有六 編磬

十有六 業簾彩架俱全 麾一 紅緞畫金龍節一 龍頭杆架俱全

瑟四 琴六 笙六 龍頭笛六 箎四 洞簫六

鳳簫二 塤二 以上俱囊以黃綾 簫三十六 翟三十

六 敔一 祝一 雉尾一百有八 孔雀全尾一

歌詩板十有六 大鳳一 小鳳十 架俱全 合樂

桌張十有六

按知縣沈澄於康熙五十年奉文捐置各器延師演習復以入官土名芹菜湖田七十五畝零為遞年修葺樂器費勒碑義學文見後及澄既陞任不兩年而樂器皆廢僅存編鐘六口貯學祭器庫

新置樂器

大麾一 連龍杆架全 應鼓二 連架 應鼓頂鼓圍二

應鼓蓋綫串四十 應鼓珠圍八 鼉鼓一 連架

門鼓一 連架 僉名鼓一 編鐘六 編磬十有六

編鐘磬架二 連絲綫綫鳳全 特磬一 僉名鐘一 特

磬架僉名鐘架各一 連絲綫綫鳳全 琴六 連囊併箱架全 瑟六

連囊併箱架全 搏拊二 連架 笙六 連囊 龍笛六 連囊

洞簫六 連囊 箎四 連囊 祝一 連架 鳳簫二

旌節二 連金線八寶帶全 敔一 連座 龍頭簫三十六

三眼籥三十六 戚二 干二 雉尾一百有八

孔雀尾六 歌詩章板二

以上俱乾隆元年置

塾舍

城南社學

在南門下街廻龍關左後廢為廟奉石文光祀之

石灘舊志作龍灘社學

在下都石灘舊為真君廟嘉靖中毀之改為社學石灘紳士奉先師主祀焉

附明邑令盛賚汝修復石灘社學記石灘為增沃土而無學建社學者自督學莊渠魏公始學故為真君堂地邃而迂民歲率子弟會賽公曰蒙養然乎其將弗才也已命撤其像大書石灘社學四字顏於門實嘉靖甲申秋也數年來官司亦迂其地眾遂以博以盜且窟焉坐是湮廢嘉靖辛亥余既辟其殺人於茲者過輒召其父老誨之且時進儒紳之卓然者諭焉與之遊且息焉逾年而小子志學乃舉修事甫成上於青巖胡公公以意遍示屬之聯師時加課校石灘自是復有社學云為區周一百武繚之以垣中有塾地為楹一十有五廳曰養正示始也堂曰願學而崇以聖師示宗也兩廂祀其先達勸賢也門缺中抵津示原也其事兆于壬子陽月成于甲寅二月碑陰刻官民為用缺緝示公也歲入猪錢房租以支用費而守之以僧示久也莊渠字子材吳人督廣學以正青巖字君澤蜀人新敝俗以學而江右江公理川於師徒尤謹乃今讀法者益眾均用意於教化者教化不明君子以為盜源茲舉也石灘之民其才乎丙辰春

月知縣盛賚
汝記之以俟

高埔社學

在楊梅都高埔村今廢

維新社學

在楊梅都鄧路下村今廢

瑤溪社學

在綏寧都雅瑤村今廢

沙堤社學

在甘泉都沙貝村今廢

龍溪社學

在下都龍地村今廢

菊坡書院

在鳳凰山南麓宋清獻公故居後廢為城隍廟僅以

廟後隙地奉清獻之祀

獨岡書院

在甘泉都沙貝村湛若水建今廢

蓮洞

舊志作蓮花

書院

在清湖都南樵山湛若水建今廢

增城縣志

卷之九

學校

塾舍

七

明誠書院

在清獻坊西郭巷內西向湛若水建左門上達白沙
祠屈大均廣東新語云明誠書院在增城縣城中湛
文簡所建堂上有心性圖及文簡所書心性圖說右
隅王文成所書五言古詩今陽明集中書泉翁壁詩
是也行書字大如拳漫滅不可盡識堂後石刻文簡
像幙頭執簡上有隸書心性圖說甘泉書院遍天下
此其發祥之地故尤重云

附盛賚汝重修明誠書院碑記增城縣儒學之南別
有明誠書院自甘泉湛先生始院故千戶楊政之宅

正德中先生捐俸金五百易之祠陳公白沙以明理
學縣令朱君砥齋扁其門為明誠書院先生揭心性
圖說於堂朱君肖像于石并其說刻之自是學益傳
積十餘年先生輟大司馬政歸院諸生裹糧來依至
寓于外舍先生憂焉曰事誠在我乃嘉靖壬子年既
八十有七鳩工市材卜二月朔始事瑞賢堂為三楹
觀善堂如之兩廂各為士號舍東道以通白沙之祠
祠翼以室而志前亭為席光遵白沙借我一席光語
也西山有麓復闢柴門庖舍親師堂寢六楹宋御書
丞相鄉賢崔公之菊坡亭在其表門由席光可入繚
之以垣為用凡若干緡其捐蓮洞之穀貯院以祀白
沙安養諸生者歲凡一百二十八石倉鑰司于春岡
張公出納必告縣先生蓋皆為明誠為之越明年落
成以余從朱君後屬記事以詔有承余惟明誠之學
以學聖也天生人理均界焉國家建學造士望均屬
焉然舉業盛而德業或微非舉業無裨于德也岐而
二之耳若明誠則何所不貫先生弱冠魁士于鄉長
學白沙以自然為宗不仕者十有三年親老而出魁

天下爲名太史召師國學尙書三部所至勲德卓然
先生曾岐二業爲二乎哉明誠之修夫亦以身勸士
士學于學退而遊于斯食且息于斯誠作而曰我于
學造之矣先生改宅爲院扁爲明誠以復萃我豈學
以儒名所重者誠有在耶樂爾羣各敬爾業卽圖以
求心卽心以求理卽理以求各底于誠而又勿忘勿
助優游厭飲焉以俟其自得則體用內外大小精粗
庶幾合一潛爲顏孟見爲伊傅周召運誠承天言行
相顧皆足以宅天下信後世庸非先生修明誠公所
學翼國家登士於聖域者哉人言增城爲五嶺山水
之會天地之盡氣在焉理學相傳真儒繼出源
本之地當有所歸余故記而饒之石俾勿壞

鳳池書院

在縣治西北學宮左際留倉前知縣鄒元忠建舊有
講堂一座儀門一座大門一座旁列號舍四十間爲

諸生校藝之所後人另於堂外建祠肖元忠像祀之
以鴈塔祠翔鳳塔祠田租共撥銀十兩歲支修祠銀
二兩供祭銀三兩存留銀五兩積三年給科舉生爲
祭魁應試費其號舍傾圮收地租歸學官充公康熙
間有訓導乾沒修祠一項祠圮遂遷元忠像於講堂
至雍正五年大雨水儀門旁屋圮十年颶風講堂墻
亦圮像幾毀教諭高猶寵葺之乾隆十七年復圮因
重建焉

鄒元標鳳池書院記見藝文志

附邑令管一清重修鳳池書院記鳳池書院爲明邑令建昌鄒公之所創而吉水忠介公實爲之記幾二百年矣其中興廢者不一迨歲之壬申邑博士梁君乃謀於鄉之士大夫一撤而新之堂室齋廡翼如也予嘗考忠介公以進士觀政刑部卽以爭奪情事忤江凌迨其晚年於紅丸一案執春秋之義毅然而不可奪立朝嶽嶽大節皆載在明史然其生平固嘗講於良知之學者自卽署罷官家居三十年無日不以談性命爲事卽在京師時忌者猶以首善一席相訾嗾故其記鳳池也諄諄作聖之旨而於甘泉先生三致意焉蓋推明先哲之遺澤以啟迺來學其意良深遠矣夫漢人之學號爲訓詁穿鑿而其時學者猶墨守一經專門家法窮年矻矻務求通於聖人之旨迨齊梁而後相矜以藻飾士之所習者日趨於華靡而其去道也愈遠予向者亦嘗取天下之書而讀之見典章名物之富兼收並蓄唯恐其或遺焉見古人瓌瑋奇麗之作心摹手追如驂之靳唯恐其不及焉磨精耗神沒溺其中而不知返迄於今受事茲土因得

縱觀甘泉先生之書以求所謂江門之脉者夫而後爽然自失悔前此之所爲爲無益然心性之在人也

講院

在會仙舖邑紳曾受益王三奇舉人盧應徵等捐建爲講學課士之所知縣謝士章置田四十七畝二分歲收租銀一十二兩除輸稅外以四兩爲諸生會課筆墨費積二兩爲諸生科舉應試費餘存爲縉紳講

學燕會之需有碑

鳳臺書院

在縣西南分司左崇禎十三年知縣陸清源捐俸創建又捐置金牛蟬沙湖等田實稅五十二畝七分零立名陸鳳臺入坊都十甲孫永思戶下後被龔茂化等包佔公籲藩司審還書院雍正中卽其舊址改建叅將署以田併入鴈塔祠書院遂廢

以文書院

在城西西園菴左康熙十七年知縣黃楷建捐俸置

慶福都田六十餘畝立戶黃以文附坊都四畝末甲每歲除納稅祭魁課文外貯銀二兩爲科舉生應試費另置田二十畝零以給守院僧

增江義學

在縣治北康熙二十五年知縣蔡淑建雍正六年知縣金虞廷因建兵房而廢之

附邑令蔡淑創建增江義學序畧增城廣南望邑也龜鶴二峯跨於後增江一水環於前余奉命來牧茲土履境日見其山川秀異知其代有聞人雖然昔也此地今也亦此地胡爲乎今日之科名竟弗克比隆於昔日之文獻也哉余嘗披覽邑乘觀夫人文興衰未嘗不三致慨焉聖人云十室之邑必有忠信蓋世

不乏英才惟貴乎賢士之發憤自雄與長吏之勤宣
化育耳荀子曰學莫便乎近其人子夏曰百工居肆
以成其事則欲羣弟子學有定居人有定業誠不可
以無教養之地矣方今

聖天子振興文教忝司牧者安敢不亟亟焉以儲養人
才為急務則義學之設又烏可緩乎於是謀諸闔邑
紳耆莫不欣然樂助余因捐薄俸以為眾倡遂擇地
於縣治北隅龜峰之側刻期造作以襄盛舉惟冀諸
同志殫心協力匡予不逮行見舍宇速成集髦士講
貫其中董之以師儒摩之以德業庶幾文風丕振地
脉復靈攀鱗附鳳之儔繩繩繼起斯時也不獨與崔
湛盧胡諸先哲輝映後先亦可藉是以仰答我

皇上興學作人之鉅
典也矣是為序

鶴嶺鳴臯義學

在學宮右康熙四十五年知縣沈澄率士民捐建查

出無主荒田若干畝為歷年延師修葺用勒碑堂左

碑文 乾隆十六年重修
另載

附攝令陳廷枚重修鳴臯義學碑記士之就學猶工
之居肆也燕辟則廢其學獨學則孤陋而寡聞萃廬
托處不見異而遷後可以樂羣敬業專精其事而不
岐於趨夫古之造士家有塾黨有庠州有序國有學
俾之相觀而善以浸成為風尚其所所以漸而摩之者
為法良而為意美也故士務實修而自愛其身以愛
人國家遂收實效焉我
朝致太平百有餘年矣重熙累洽之餘教化淪浹雖荒
陬遐壤莫不有學以居遊其鄉之俊秀而士亦蒸蒸
向風

皇上聖明天縱萬幾之暇孜孜好學其於郡縣學以及
書院尤加意栽培承其流者宜何如循名責實仰體
恩意歟昌黎之刺潮也延天水趙德為之師而潮始知
學人文迄今甲嶺南幸未首春余自北旋受檄攝理

增城初至亟欲以造士為已任而役役於簿書旁午未遑也稍暇得與一二同志商論及之而後知鶴嶺之麓有書院曰鳴臯昔觀察沈公宰增邑時所建當時文教彬彬稱盛而後稍替矣邇來益就朽蠹觀者慨然有茂草之憂焉念此一方迫近省會聚增水羅山之秀崔清獻湛文簡之遺風猶有存者而顧聽其學舍荒涼書聲寥寂於義不可爰議捐學租之半以資修葺壞者更之剝者飾之使崩榱析楹斷瓦頽垣悉復舊觀蓋鳩工於長夏迨秋而落成由是延名儒以慎其楷模時其講貫可以士至如歸無憂於燥濕之不時矣夫莫為之先雖美弗彰莫為之後雖盛弗傳余即治不及期然一日亦有一日之責庶以告無罪于先大夫已耳若夫作人雅化遠追韓公而多士亦由斯交相淬厲學為聖賢以嗣徽崔湛寧無望於繼起者哉是役也司諭梁君鳳來司訓林君本達實率先之梁君高要人林君翁源人董其事縣尉馮天錫也浙江紹興人例得並書

瑞山義學

在金牛都證果寺左康熙四十九年知縣沈澄倡捐建立耆民姚玉魁生員姚湘濤捐田為延師辦祭各項支用詳載義學田碑

三鄉義學

在下都碧江涌口康熙五十六年石灘圓洲碧江三都紳士捐金創建以為課文砥礪之所

臘圃義學

在崇賢都雍正元年生員賴其茂建並捐古椽村深

水坑貝等田四十六畝零歲租七十石爲延師修脯
費

丹山義學

在雲母都朱村康熙四十四年建

及泉書院

在甘泉都沙貝村初知縣沈澄旣建鳴臯義學以甘
泉都去縣治遠不能就學乃撥出綏福都梅園等處
入官田共稅一項二十九畝充甘泉義學膏火會澄
陞任去義學不果建歲收租息延師寄寓祠廟恒苦

習業無專所乾隆十九年知縣管一清乃與紳士卜
地於村西之梳妝環山側捐俸倡建易以今名

雙鳳書院

在楊梅都高埔村東南二里許乾隆十八年紳士張
麟等以楊梅文風久不振公籲延師訓課子弟知縣
管一清因捐俸倡建書院遠近樂從釀金恐後是時
官田之腴者多以爭佃構訟乃酌增歲租併查出無
主田畝撥充書院修脯等費

贍租

射圃地

共地二段一舊址在城西新橋舖與西墟地相連有
小水溝界之後廢收其地租貯學充公一昉於嘉靖
初年提學魏校修復射禮有司因闕儒學東南隙地
以便諸生演習并建觀德亭其中未幾亭圯圃復廢
為民居即際留倉右地是也儒學歲收地租無幾

魚塘

大塘一在泮池南櫺星門外又左右小塘三學旁居
民畜魚其中歲納租錢若干緡於學以充粘補官署

費

課士田

原額九十九畝九分有奇後經清丈共丈得稅一頃
一十一畝七分有奇編糧銀四兩三錢三分色米四
斗六升歸入學養元戶內辦納其歲入租息俱由儒
學經理除完額賦外凡會課諸生卷燭飲食之費咸
取給焉始自康熙四年生員黎以勲捐置送學

一山角田地稅五十一畝四分七厘零 一葉埔心
田地稅一畝九分三厘零 一招步田地稅二十六
畝七分九厘零後因水冲除去二畝四分實二十四
畝三分九厘零 一石頭田地稅一十三畝三分五

厘零 一馮學下田地稅三畝四分二厘零 一流
孟田地稅三畝二分二厘零 一丁埔田地稅一十
一畝七分
五厘零

學院公田

額稅一頃九十六畝有奇續經佃報墾荒實共一頃
九十九畝四分有奇編糧銀七兩三錢七分八厘色
米八斗四升八合立戶名學養元辦納歲收租息除
完正賦及補平色外額租銀一十七兩一錢九分由
縣徵收解府彙解學院為支給貧士膏火之用雍正
七年經署縣左興查明每歲約溢租銀七兩積三年

共二十一兩為科舉生員贐資案存禮房

綏福都猪頭山等處田六十四號共稅一十五畝八
分零佃人湯美璽承耕 嶺貝沙等處田一十六號
共稅九畝二分八厘零佃人黃勝養承耕 陂邊等
處田四十三號共稅八畝五分三厘零佃人何履全
承耕 上都涌坊曲垆等處田四十五號共稅二
十三畝三分六厘零佃人姚廷拔單光傑等承耕
牛梯橫等處田一十九號共稅十畝四分二厘零佃
人姚携望承耕 清湖都荒田塋等處田二十四號
共稅四畝四分二厘零佃人劉作紀承耕 秋風陂
等處田一十一號共稅二畝四分五厘零佃人列成
翰承耕 金牛都下瀝等處田四十四號共稅三十
九畝八分零佃人蔡觀成等十戶分耕 旱田埔等
處田一十七號共稅七畝九分三厘零佃人吳列中
承耕 崇賢都下逕少埔等處田二十二號共稅一
十五畝七分八厘零佃人陳芳信承耕 學子田二
十四號共稅二畝一分三厘零佃人賴江貴承耕

五分無佃承	園山一號稅三畝	二畝四分一厘零佃人翟斗維承耕	七厘佃人張廖盛認租	零佃人周采南周夢祥認租	認租崇賢都廟潭地一號稅一厘六毫佃人吳玉成	于簡認租坊都地一號稅一厘六毫佃人吳玉成	人列益昌認租鎮龍市地一號稅六分零佃人陳	存悅承耕綏寧都仙村墟地三號共稅六分零佃人何	田八號共稅四分零佃人葉舒鵬承耕	共稅五畝四分零佃人葉舒鵬承耕	田八號共稅四分零佃人葉舒鵬承耕	人尹觀福承耕	江西嶺等處田二十一號共稅二畝一分九厘零佃	田九號共田四畝三分八厘零佃人何寅傳承耕	八分八厘零佃人阮本中承耕	和承耕綏寧都沙埔等處田二十六號共稅七畝	下都獨村等處田一十九號共稅八畝零佃人郭稟
-------	---------	----------------	-----------	-------------	----------------------	---------------------	---------------------	-----------------------	-----------------	----------------	-----------------	--------	----------------------	---------------------	--------------	---------------------	----------------------

文廟田地

知縣沈澄撥置坐楊梅都靈山村土名芹菜湖共稅

七十五畝九分八厘額編糧銀一兩二錢一分六厘

色米一斗三升三合立學永垂戶名辦納禮房經理

其事歲租除納國課外餘留為修葺文廟併樂器之

需

按租穀四十二石原佃潘維良認納載在沈碑可據
 後經賴元興承佃每歲僅納租銀七兩乾隆十八年
 元興以匿租爭耕與土人訐訟不已丈出溢稅十一
 畝零實共田地八十七畝斷令每畝納銀三錢二分
 另召佃石卓賢等八人分耕歲納租銀二十七兩八
 錢四分內撥支雙鳳書院修脯銀十二兩二錢餘充

修學費
如故

鳴臯義學田

知縣沈澄撥置原稅三頃八十六畝額編糧銀五兩
 六錢五分三厘色米四斗八升七合七勺立義學業
 戶名辦納歲收租息除正供外定例延師修金四十
 兩薪蔬銀十兩膳米折銀五兩四錢多者存貯備修
 義學陸續增置實共田地四頃二十八畝四分零至
 乾隆十七年佃人蔡錫寅等各具呈認加歲租因增
 修金為四十八兩聘金四兩開館席金二兩禮生燭

炭銀八兩并酌給生徒會課飯食及獎賞筆墨各費

餘仍留貯修理年終禮房吏書造冊銷算

金牛都艾洲共稅一頃八十九畝零蔡錫寅等五人
 承佃 綏福都古壘共稅一頃二十三畝何廷相承
 佃 楊梅都屏斗畝稅六畝鄧廣沾承佃 馬村禾
 塘稅八畝三分九厘零溫容秀承佃 綏福都後畝
 稅一十二畝張宏英承佃 楊梅都樟崗稅四十九
 畝六分劉良達劉良球二人承佃 慶福都大嶺稅
 一畝四分五厘徐發祥承佃 楊梅都大畝稅四畝
 四分八厘張為沾承佃 另綏福都廟涵白坭坑稅
 一十二畝黃成輔承佃 金牛都艾洲沙坦稅二十
 三畝四分零李桂月李子宜二人承佃 以上二項

稅畝沈澄
碑記未列

附邑令沈澄增城義學田碑記竊惟文廟為崇奉聖
 賢之所而義學乃樂育人才之地余承乏茲土屢經

捐俸以資修建延師迪訓復捐置樂器請設樂舞諸生演習以光祀典幸宮墻赫濯而多士奮興正未可量也但思政事貴於可循而捐措終難善後余夙夜圖維乘巳丑清丈之役將清出靈山村無主荒田若干撥送文廟艾洲古壘等處田若干撥送鳴臯義學又據鴉岡約民姚玉魁將馬鼻嶺逕心等處田若干生員姚湘濤將花園山等處田若干呈送瑞山義學又清湖都張集文與管定國徐俊達互爭梅園河田等田若干經余訊定奉院司各憲允詳撥甘泉義學以上四處田產及糧額租穀銀兩并延師修繕各項數目俱案存禮左禮司兩房經承照額收支年終銷算歷歲相仍爲例今余忝移司馬除關牒署縣儒學外但恐日久弊生闔邑文教攸關用照移冊勒諸貞珉惟期廟祀常新人文蔚起實予所厚望焉至於擴而充之則在後之君子矣爰爲備列勒石於左按記後開載稅畝今悉分註各本條下無庸複見其佃人更易過半歷年租額有增有減數亦相懸因併削之

甘泉都延師稅畝

知縣沈澄撥給共田地山塘一頃二十九畝坐綏福都梅園河田等處額編糧銀五兩一錢八分七厘色米五斗六升五合二勺通年除完正供外支延師修金二十四兩膳米六石係沙貝村紳士經理今改屬及泉書院

瑞山義學田地

金牛都耆民姚玉魁生員姚湘濤先後捐置共稅一頃二畝有奇

玉魁捐馬鼻嶺逕心等處稅九十八畝湘濤捐花園山等處稅四畝三分額

編糧銀二兩七錢二分三厘色米二斗四升八合
年除納糧供祀外支延師束修穀七十石係鴉岡等
村紳士經理

清湖都義學沙田

清湖綏寧兩都交界處水生有泥坦乾隆二年生
員劉仲貴等告承充本都義學公田共稅二十畝有
奇一名長坦計稅三畝八分一名蛇藏
畝計稅一十六畝三分五厘綏寧士民羣起
控爭結訟累年奉憲斷歸清湖義學仍勒石不許仲
貴等藉公霸佃然義學至今未建

宗泗義學埔田

綏寧都招步村有區思埔老荒一段李陳列三姓夥
出工本墾熟告承以爲義學田租遠近羣起控爭案
延數載乾隆十三年奉 憲檄斷以原墾之九十七
畝六分一厘准充該都義學膏火立名宗泗義學擇
人董理其事外有新墾及未墾稅共四十九畝零另
召貧民佃耕歸其租於文廟及鳴臯義學公用後建
宗泗義學未成所有另佃一項亦無粒租之入現在
清釐以杜影佔

雙鳳書院歲租

乾隆十八年知縣管一清因膏火無出逐欸立案撥給

一撥楊梅都芹菜湖文廟田租銀一十二兩二錢
一撥崇賢都下逕沙埔學田溢租穀二十三石
一撥楊梅都樟崗村夾了泖無主田四畝五分二厘零
練以憑等承佃一撥上都清嶺嘴無主墾地七畝
四厘零
處影射官荒
承佃
分
零
承佃
承佃

增城縣志卷之九 終

